

Pemimpin kerajaan, pembangkang ucap tahniah

JOHOR BAHRU 23 Mac - Pemimpin kerajaan dan pembangkang di negeri ini mengucapkan tahniah kepada Sultan Ibrahim Sultan Iskandar yang dimahkotakan sebagai Sultan Johor dalam Istiadat Kemahkotaan hari ini.

Pengerusi Jawatankuasa Agama negeri, **Abd. Mutalip Abd. Rahim** berkata, Istiadat Kemahkotaan tersebut bukan sahaja mencatat sejarah baru negeri ini, malah memperlihatkan kekayaan sejarah serta adat bangsa Johor.

Beliau berkata, upacara tersebut turut mengangkat kedaulatan Sultan Johor serta kedudukannya sebagai ketua agama di negeri ini.

“Sebagai ketua agama negeri ini, baginda menitikberatkan pembangunan pendidikan Islam dengan membangunkan sekolah agama dan pusat pengajian Islam.

“Walaupun pembangunan pesat dilakukan di negeri ini, aspek agama tidak dilupakan malah membangun seiring dari segi duniawi dan ukhrawi,” katanya ketika dihubungi *Utusan Malaysia*.

Bagi Pengerusi Jawatankuasa Kerja Raya, Kemajuan Luar Bandar dan Wilayah negeri, **Datuk Ir. Has-**



**ABD. MUTALIP
ABD. RAHIM**



HASNI MOHAMMAD



TEE SIEW KIONG



AMINOLHUDA HASSAN

ni Mohammad, Istiadat Kemahkotaan itu dapat meningkatkan kefahaman rakyat terhadap institusi raja di negeri ini.

Beliau berkata, menerusi istiadat tersebut rakyat dapat memahami tentang kedudukan Sultan Johor sebagai lambang keselamatan dan maruah bangsa.

Sementara itu, Pengerusi

Jawatankuasa Pelancongan, Perdagangan dan Kepenggunaan negeri, **Datuk Tee Siew Kiong** berkata, kehadiran rakyat sejak awal pagi menyaksikan perarakan Istiadat Kemahkotaan menunjukkan betapa baginda disayang rakyat jelata.

“Saya berharap kerajaan ini di bawah naungan Tuanku akan terus maju jaya dan rakyat Johor dapat menikmati pembangunan yang dijalankan,” katanya.

Pesuruhjaya Pas negeri, **Aminolhuda Hassan** turut mendoakan kesejahteraan dan keselamatan yang berpanjangan ke atas Sultan Ibrahim setelah dimahkotakan hari ini.

“Kami berikrar taat setia di bawah naungan Tuanku serta mendoakan Tuanku dikurniakan taufik dan hidayah Allah agar terus memimpin rakyat dengan bijaksana, seterusnya membawa Johor ke arah pembangunan yang maju dan makmur,” katanya.

Sementara itu, Pengerusi DAP negeri, **Liew Chin Tong** turut mengucapkan tahniah kepada Sultan Ibrahim dan menyifatkan Istiadat Kemahkotaan itu amat istimewa dan penuh bersejarah.